


En memoria da Giusep Schmid-Pargätsi 31-7-1937 – 13-12-2020

Il sulet ver ed impurontont dalla veta ein ils fastitgs da carezia che nus schein anavos cu nus mein. (Albert Schweizer)



E fastitgs da carezia ha Giusep veramein schau anavos in tschuat. Da quei prezius relasch vegnan ils confamiliars dil Giusep a saver seprofitar aunc ditg. Quels fastitgs vegnan a purtar levgera.

Persunalmein hai jeu adina giu ina amicabla relaziun cul Giusep e perquei sundel vegnius dumandaus dils fargliuns Schmid da nudar ezacons tratgs da sia veta. A caschun da spassegiadas sur la staziun hai jeu meinsvart entupau il Giusep ed el gudeva in cuort discours. La davosa gada ei quei stau il meins november, entupond el cun siu niev vehichel electric. Mala-

mein eis el s'embarlacaus ord la sutga vi sil baun avon l'ustria dalla staziun. Frestgamein e cun interess ha el dau ina paterlada. Cun dar adia ha Giusep exprimiu sia cuntentientscha e tenuta positiva: «Basta, vai la sanadad!»

Priu ora la movibladad sesenteva el pulit e pér gliendisdis, ils 7 da decembre eis el selamentaus da mal il dies e la gievgia ha el stuiu serender el spital. In infect e la disdida dil narunchel han spossau bravamein. Tut ils confamiliars han astgau prender cumiau dil car Giusep e la dumengia sera eis el sedurmentaus en tutta pasch.

Curriculum

Il Giusep haveva bien uorden ed aschia haveva el era nudau cuort e bein siu cuors.

Ils 31 da fenadur 1932 ei Giusep naschius sco schumellin da Robert ella ucliva da Cavorgia e carschius si ensemens cun 8 fargliuns. Lur geniturs ein stai il Vigeli Schmid e la Maria Schmid-Berther. Da Maunsut ha el frequentau tut ils onns da scola. Primavera e stad ha el pertgirau vadials, vaccas e fatg cavrer. Finida la scola eis el staus in onn e miez giu Cuera e contuorn sco fumegl. Silsuenter ha el fatg igl emprendissadi da pec a Nesslau/SG. Finida

la scola da recrut ha Giusep luvrau biebein dus onns e miez sil mistregn a Cuera e lu tiel Coop en pasternaria a Landquart. A Landquart ha el empriu d'enconuscher sia dunna Hermine Pargätsi. Igl onn 1957 ein els secasai a Gionda, nua ch'ei han aviert in kiosc. Quel ha sia dunna menau bunamein 50 onns. Igl atun 1959 han Giusep e siu frar Vigeli baghegiau casa a Gionda. Lur lètg ha gudiu gronda ventira culs quater affons Silvio, Werner, Marco e Renata. Onns pli tard ha la famiglia cumprau ina casa a Camischolas en la quala ei habiteschan aunc oz.

Uffecis ed uniuns:

Ella societad da Musica Sedrun ha Giusep sunau 35 onns ed ei naturalmein vegnius numnaus commember d'honur e veteran cantunal e federal. Per la musica ha el era funcziunau sco pedel ed actuar. Cun las soras dome-nicanas che eran engaschadas quels onns en vischnaunca eis el segidaus ed ha menau la cassa. Era per l'uniun dils tiradurs ha Giusep fatg cassier. Entgins onns eis el era actuar digl acquaduct fontauna s. Gion.

Igl onn 1976 han Giusep e Conrad Berther cun auters amitgs fundau l'Uniun da Sunatibas Tujetsch e Giusep ha naturalmein era sunau in tschuppel onns ell'uniun.

Ei po esser stau enzacu igl onn 1975 cu Giusep ha supplicau mei da vegnir giu la KVR en luvratori. Entupau hai jeu il Conrad Berther ed el. Els eran vidlunder dad entaglia e formar duas tibas dad alp. Els levan in cussegli da mei pertuccont accordar ils instruments. Cussegli hai jeu saviu dar negins – jeu hai sulettamein dubitau che quella ovra vegni mai e pli mai a reussir. Denton jeu sun sesbagliaus malamein! Sia tiba ha fatg parada en baselgia sper sia urna e l'Uniun da Sunatibas Tujetsch exista aunc oz. –

Ina legra episoda

Sco dirigent dalla Musica Sedrun hai jeu empriu d'enconuscher il Giusep sco fideivel e premurau commember. Denter el e siu collega plassava el avon igl exercezi adina ina sutga pil biro, sco el scheva. Sper sunar siu tgiern en es e las obligaziuns sco actuar ni auter ha el schizun fatg ina fatschenta privata cun in camerat musicant. Alla fin digl exercezi han els dus dau il maun per confirmar la cumpra d'in ladretsch ch'els dus havevan contrahau ora duront quella emprova.

Sur Mattiu ha celebrau il survetsch funeral ch'ei vegnius enramaus musi-calmein da Fabiola Schmid-Bläsi cun ses dus fecls Pascal e Gian-Luca e

dalla giuvna Anna Bläsi. Per far honur al fundatur dall'Uniun da Sunatibas ha Ignazi Monn schau resunar la tiba d'alp. Dieus paghi per las grondiusas producziuns!

Stai bein preziau Giusep! Nus savein bien grau per tes prezius survetschs en favur dalla communitad e tia famiglia sa profitar da tes fastitgs da carezia.

Beni Hendry